

# SKOUDĖŠKĖ penkta karta kvėit rašītė žemaitėška DĖKTANTA



Sausė mienėsė vėdorie Skouda bėblioteka ėšplatėna pranešėma, kad šiū metu vaserė 8 d. 18 adina viks žemaitėšks dėktants (anuo dalivė tories rašītė laikidamies kalbininka Pabriežas Jūzapa parėngtū žemaitėškas rašības patarėmu. Bėbliotekas interneta svetainie ir pavėišinta tuoki inpormacėjė:

„Dėktanta rašims viks mėšrė – ėr nuotulėnio, ėr kontaktėnio būdo. Dėktants vaserė 8 dėina 18.00 adina būs rašuoms ėr tėisiuogė transliuojems internetė – Skouda rajuona savėvaldībės R. Granauskė vėišuosės bėbliotekas FB paskiruo.

Dėktanta anuo dalivė rašis bėbliotekuo ėr veiziedamė tėisiuogėnė transliacėjė. Anamė gal dalivautė vėsė nuorėntėijė – ne tik Žemaitėjės, bet ė vėsuos Lietovuos giventuojė, solaukė 14 metu, katrėms rūp pasėtėkrintė torėmas žemaitiu kalbuos gramatėkas ė rašības žėnės, ėšdieliuotas muokslėnemė daktara Pabriežas Jūzapa leidėnie „Žemaičių kalba ir rašyba“.

Dėktanta dalivė, pabėngė anuo rašītė, tou, kou parašė, tories par posadini noskenoutė, nopaveiksloutė arba WORD pormata duokomėnto ėšsiūstė elektruo-nėnė pašta adreso

**dalia.zabitiene@gmail.com**

Regėstruotėis el. pašto

**birute.sruogiene@svb.lt.**

Galies dėktanta rašītė ėr be ėšonkstėnės registracėjės.

Kvėitam okatlivā dalivautė dėktanta rašimė!“

**2017–2020 m.**

**dėktantu rezoltatā**

Bėblioteka skelb, ka 2017 m. dėktanta rašė 12 daliviu. Geriausė ons pavika Skouda rajuona laikraštė „Mūsų žodis“

redaktuorė-leidiejė Kaniavienė Maritė ėr Skouda rajuona savėvaldībės R. Granauskė vėišuosės bėbliotekas darbuotuojoms Daukantienė Gražinā ėr Tiškienė Aušrā.

2018 m. tarp 10 daliviu geriausės žėmės paruodė Skouda literatu kluba „Nojus“ narės Jurgilevičienė Stasė, Pajauskienė Joana ėr Skouda rajuona laikraštė „Mūsų žodis“ redaktuorė-leidiejė Kaniavienė Maritė.

2019 m. jau bova mažne dvėgoba daugiau dėktanta daliviu. Geriausė anuo parašė Skouda rajuona savėvaldībės R. Granauskė vėišuosės bėbliotekas vyresniuojė bėbliotekininkė Daukantienė Gražina, Skouda rajuona laikraštė „Mūsų žodis“ redaktuorė-leidiejė Kaniavienė Maritė ėr Skouda literatu kluba „Nojus“ narie Pajauskienė Joana. Paskatėnamāsis prizos bova paskėrts jauniausė dėktanta dalivė Ereminātė Renatā.

2020 m. dėktanta dalivė jau bova ne tik ėš Skouda rajuona, bet ėr ėš kėtū Lietovuos vėitu. Tās metās jau vika tiesiuogėnė dėktanta transliacėjė internetė. Po anuos bova solaukta 20 darbū. Ši karta geriausė sekies Lietovuos kaima rašituoju sąjungas narė, Skouda literatu kluba „Nojus“ tarības narė, Šatiu seniūnėjės Rukū kaima seniūnātė Lekniuvienė Danutė, Lietovuos neprėklusomu rašituoju sąjungas ėr Plungės literatu kluba „Vaivorykštė“ narė Stražinskātė-Glinskienė Irenā ėš Aleksėndrava (Pungės r.), Skouda rajuona laikraštė „Mūsų žodis“ redaktuorė-leidiejė Kaniavienė Maritė, aleksėndravėškė bėbliotekininkė Pokvītienė Virginėjė ėr Skouda rajuona savėvaldībės R. Granauskė vėišuosės bėbliotekas Lėnkimu filiala bėbliotekininkė Daukantienė Gražinā.